

山右石刻叢編

山右石刻叢編卷四

陽通王身頭品級兵部侍郎兼都察院右副都御史巡撫山西並管提督鹽政印務節制太原城守尉阿胡聘之說

唐

景雲觀天尊碑

碑高三尺二寸廣一尺八寸二十行行三十六字正書額
題天尊之碑四字篆書陽文今在聞喜縣東五十里觀底
村

維大唐貞觀八年歲次甲午九月庚午朔二日辛未祀觀元
始天尊素象之碑

竊以珠星戩曜方覺日月為明鍾鼓彝音始寤雷霆為大未
與驥足莫見千里之馳不逐鵬翮安知九萬之勢况復覆天
載地苞括无窮瓊天(玄)圃坐奇玉液金漿之異至如柱析西
北維毀東南垂(麻)象於天隅烈成形於地分風驅雷震凶時

川流載荷吹噓之功實藉財成之力千品萬類盡妙窮機極
目而觀孰非感道吐玄微之深趣引消息之幽靈表闢蒿於
冲虛起摧衡於无欲漢石謁於河上軒帝就於崆峒是知古
先詰口稟而成化自淳風漸歇澆政始興分別念生眾惡對
起清流既隔口用沈淪上聖爰生應時救物結口大梵之氣
是曰口形天尊位居始青之中不爲元始之稱口劫輪化帝
立象存威攝萬口超三景始化浮黎之國終於宛利虫城
闢衆妙之門駕塵橋之路驚川不息駿隙難留恐青錄之無
編墨書而先記然則欲拔幽魂當依大道將求度世必資
上聖於是太上道民大宗口縣中正祁文才宗老祁則合宗
等蓋承帝堯之襲殷使持節鎮西大將軍祁山君永之後晉
大夫周陽侯奚之胤魏使持節秦州刺史河南尹吏部尙書

司徒太尉公儂之孫也鐘鼎之重雲嶽無以並其高軒蓋之榮惠水不足方其遠加以令聞令望如璧如珪海內仰其嘉聲當土欽其風軌有隋開皇修營雲觀真臺仙閣上入雲霞月殿日宮高排星漢久闕真容靡得申其如在傾心卽產敬造元始天尊素像一區真人玉童天丁師子地祇之載香山而皆左右相對金容旣飾如放身中之光慧眼已開似笑福堂之國靈儀勝業雖無勒於景鍾敢樹豐碑傳之於後葉與等曾題石度三劫而恆存王母記空自一書而尢住其詞曰

混元分泮清濁斯開列其九氣乃具三才有身有我爲患爲災善惡同趣福禍俱來其一上駉下應發乎始青厯劫常起改號存形變化方便大拯羣生萬帝齊駕五老咸迎其二唯君先

葉發系陶唐鐘鼎相襲福慶綿長松貞玉潤桂馥蘭芳既美
且詰邦家之光

其三

神容儼儼靈宇峩峩澄潭曠鏡垂石頽隨

□官乍萃羽客時過普沾无極俱超大羅

其四

按碑在聞喜縣東五十里觀底村景雲觀文駢麗書作北
魏體無撰書人姓名文內祁文才稱太上道民太上者真
詰太上高聖玉晨大道君也乃上清真人爲老子之師或
云卽老子非也道民之稱亦猶奉釋教者稱佛弟子謝太
傅帖已見之黃山谷言安石奉五斗米道者此奉太上同
爲道家者流故亦稱道民所敘祁氏淵源稱爲堯後以堯
爲伊祁氏故然邵雁門姓解云祁出黃帝華胄遙遙不足
深攷其稱使持節鎮西大將軍祁山君承而繫之殷按其
官職大要是南北朝時人而列於祁奚之前又是殷爲殷

商之殷殷商豈有此官祁奚稱爲周陽侯亦不知何據其稱太尉公儁魏書亦無傳豈卽蔡儁耶而儁爲吏部尙書贈司空未嘗爲秦州刺史籍貫亦不同攷北史儒林熊安生傳或誑之曰某村古冢是晉河南將軍熊光去君七十二世舊有碑爲村人埋匿安生求之不得連年訟焉冀州長史鄭大謹判之曰七十二世乃是義皇上人河南將軍晉無此號號訴非理安生經學大師尙有此誤卽新唐書世系表亦頗有似此者祁奚稱爲周陽侯太尉公儁云云俱無從攷闕疑可也

碑陰有字未見碑見通志金石記

裴鏡民碑

碑高四尺九寸五分廣二尺六寸八分二十三行行五十二字正書今在閩喜縣裴柏村晉公廟

隋故益州總管府司馬裴君碑銘

并序

粵惟上德希世挺生存則道照於人倫沒則名飛於史策宜其計功代鏤鐘鼎永貽長世昭示後昆君諱鏡民字君倩河東聞喜人也唐虞之盛伯益控其遙原殷周以還仲行膺其餘慶微則擅美當塗冠則流芳中夏金張舊業遠謝聲塵江漢英靈多慙光價祖靖憲魏銀青光祿大夫汾州刺史銀章青綬登高能賦揚波流惡政以□□父漢周車路大夫儀同三司晉州刺史雅道儒風聲動當世班條布政恩結去思君上表雲氣遙膺星象虛化與貞固同歸愛景共□凝一致懸河若訥每括智囊□水澄神自開靈鑒及擇師請益遊方問道性與稽古心照神文佩游夏之芳塵爲潘張之益友立仁之道仁義靡遺事親之德愛敬同盡迹屈衡□聲馳上國莫府交辟公車致禮晉蕩公受博陸之□處阿衡之寄爲其諸

子精選府寮辟爲譚公大將軍記○府中爲其○曰令德日
新裴鏡民昔○越爲其世子辟王安期取其儀形之美○濟
崇其府望辟阮嗣宗重其文學之譽我貽羔鴈兼而有之尋
丁內艱去職○車方駕金革在辰喪禮未○多從權奪朝廷
以君羸○過甚特許終哀○動風俗皆此類也建德初以君
爲宋王○讀尋授記室忝軍遷司錄宣○九年授吏部上士
攝少吏部研幾汲引之方遊刃銓衡之地能官在○咸事無
遺大吏部竟陵公卽有隨之滕○也亮拔不群英姿秀發重
君才行深見褒獎每○裴楷清通之望復見斯人開皇受禪
其日除尙書左外兵郎尋改爲兵部侍郎魏晉以還臺郎顯
要官方始革揚歷是膺自非器重望○無以○斯禮秩華陽
地險控御遐長蜀王秀以○子之尊擁旄作鎮寮屬望重妙

簡時賢以君為西南道行臺兵部侍郎及行臺廢除○州摠
管府掾尋○益州摠管府司馬蜀王年止勝衣童心未改文
○佐吏○非○人君言必盡忠行惟直道省府之內莫不敬
而憚之○臺民部尙書陳茂情恃惟舊心多慢下雖○斷乖
方○敢違異惟君○理抗直未嘗○旨兵部尙書京兆杜杲
每謂人曰不值盤根錯○不表利器裴君匪躬○監可謂美
矣開皇十六年西南夷○從構亂君摠率士卒應機致討
後軍不繫戰危喪律以三月癸丑朔十日辛未陷於賊庭
季路結纓志無苟免温序銜須義不生辱永懷斯道羨君之
平生風烈焉惟君靈府浚徹神○開敏英略未明沉幾內斷
培風自遠背丹穴以來儀逸氣不群○青雲而孤竦許邵月
巨之論韞義生風黃童日下之聲乘虛效響彈冠莫府掌記

文房媚韶景而揚華肅清風而振藻珥筆南宮垂纓西蜀戎
事之重必司□政蒐狩於是得時風霜以之順序比□月於
東曹又典午於南正卷熊掌□重義安馬革以輕生神道□
□□結搆農夫輟耕而野祭機婦捐珠而巷□西蜀父老
至于今思之君第二子太僕少卿洛州都督□長史上柱國
翼城縣開國公勳□□道於周行構丕基於鴻緒感四序之
亟變視萬物而永言思（五）遺範式昭貞石其銘曰

靈□遠派大□流光美哉地德鬱矣□芳高門鍾□世□旗
常鷓鴣接翼金玉其相惟君載挺道符人俊灼灼外明溫溫
內潤瞻之忽後仰之□峻抱月澄清含風發韻濯纓資□公
府馳名永懷喪制易俗申情爰掌書記俄屬銓衡清通之譽
遠嗣家聲開皇在辰萬象咸鏡靈開天府典司軍政列宿上

膺中和俯咏永懷神道斯人斯口層梁毀口靖口風弼戈
紀口肅口銘功柏庭永闕泉路斯窮九京不作萬古書忠明
珠重世分茅錫社仰嗣丕基口長治絕雲使翼追風頰頰
以口口口口口口口口口口

唐貞觀十一年十月廿二日樹碑 口口賜墳塋功力
並即口了

宗正卿安平縣開國子李百藥製

行尚書金部員外郎建口縣開國男殷令名書

按此碑已見宋趙明誠金石錄碑額題益州總管司馬裴君碑九篆字而金石錄作

益州長史似未見額也金石萃編據唐表攷其世系最詳表定裴氏

五房此司馬鏡民乃東眷裴也鏡民與皇甫誕皆隋臣死
事者故貞觀中追立碑以表之北史唐表所載鏡民官位

事實皆略得此可補二史之闕裴君仕周名位已顯楊氏受禪不能效竇氏之女投堂明志革命之際卽除尙書以視徐廣楊彪有慚德矣蜀王秀黷倫蔑理何可爲其官屬西南夷之役喪軀壇場豈亦借口衆人國士之說乎度亦兵挫被戕非真結纓盡命也史於西南夷之亂略而不書蘭泉疑卽史萬歲平西甯羌王世積平桂州賊之事未免昧於地理案隋書地志西甯屬始安郡大業初併爲桂林桂州卽始安也爲今廣西地鏡民死事在蜀西南夷乃邛部越雋冉駹邛笮之屬漢武帝遣司馬相如所通之地爲今四川南路與桂州渺不相涉且出師年月亦各不同斷非一事當時或偶爾蠢動不勞征服史遂略而不書歟蘭泉謬爲附會失檢甚矣此碑爲李百藥撰殷令名書按令

名唐書無傳述書賦注令名陳郡人畫家傳云陳司農卿不害子金石錄令名與其子仲容皆以能書擅名一時法書要錄又云令名開山子考陳書孝行傳殷不害子僧首弟不佞子梵童唐書殷囑傳父僧首是開山爲不害之孫又云從祖弟聞禮有文學子仲容亦有名是仲容爲聞禮之子開山之猶子不佞之曾孫聞禮或卽令名唐人多以字行亦未可知然決非開山之子與不害相去更遠矣唐書李百藥傳貞觀元年拜中書舍人封安平縣男四年授太子右庶子遷散騎常侍進左庶子宗正卿爵爲子久之乞致仕卒年八十四是其製此文亦在致仕之年矣碑見平津讀碑記金石錄跋尾通志金石記又周書裴寬傳弟漢車路下大夫天和五年加車騎大將軍儀同三司卒贈

晉州刺史子鏡民少聰敏涉獵經史大將軍譚公會記室
參軍後歷宋王寔侍讀轉記室遷司錄宣政初吏部上士
大象末春官府都上士皆可與此碑相參

晉祠銘

石高五尺三寸廣三尺三寸二十八
行行四十八字行書今在太原縣

晉祠之銘

并序

御製 御書

夫興邦建國資欬親以作輔分珪錫社寔茂德之攸居非親
無以隆基非德無以啓化是知功伴分陝奕葉之慶弥彰道
洽留棠傳芳之跡斯在惟神誕靈周室降德鄴都䟽派天潢
分枝璇極經仁緯義履順居貞揭日月以為躬麗高明之質
括滄溟而為量體弘潤之資德乃民宗望惟國範故能協隆

鼎祚贊七百之洪基光啓維城開一匡之霸業既而今古革
運舟壑潛遷雖地盡三分而餘風未泯世移千祀而遺烈猶
存⑤化曠而無名神理幽而靡究故歆祠利禱若存若亡濟
世匡民如顯如晦臨汾川而降祉構仁智以棲神金闕九層
鄒蓬萊之已陋玉樓千仞趾崑閩之非竒落月伍於桂蕊流
星起於珠樹若夫崇山亘峙作鎮叅墟襟帶邊亭標臨朔土
懸崖百丈斨日虧紅絕嶺萬尋橫天聳翠霞無機而散錦峯
非水而開蓮石鏡流輝孤巖霄朗松蘿曳影重谿晝昏碧霧
紫煙燄古今之色⑤霜絳雪皎冬夏之光其施惠也則和風
源露是生油雲膏雨斯起其至仁也則蛻裳鶴盖息焉飛禽
走獸依焉其剛節也則治亂不改其形寒暑莫移其拯其大
量也則育萬物而不倦資四方而靡窮故以衆美攸歸明祇

是宅豈如羅浮之島拔嶺南遷舞陽之山移基北轉以夫挺
秀之質而無居常之資故知靈岳標竒託神威而為固加以
飛泉涌砌激石分湍縈氛霧而終清有英俊之貞搃住方圓
以成像體聖賢之屈伸日注不窮類芳猷之無絕年傾不溢
同上德之誠盈陰澗懷水春留冬鏡陽巖引溜冬結春苔非
疏勒之可方豈瀑布之能擬至如濁涇清渭歲歲同流碧海
黃河時時一變以夫括地之紀橫天之源不能澤其常莫能
殊其搃信乃茲泉表異帶仙宇而為珍仰神居之肅清想徽
音其如在是以朱輪華轂接軼於壇衛玉幣豐柔連箱於廟
闕氤氳靈氣仰之而弥高昭晰神光望之而逾肅潛通_(玄)化
不爽於錙銖感應明徵有逾於影響惟賢是輔非柔稷之為
馨唯德是依豈筐篚之為惠昔有隨昏季緇紀崩淪四海騰

波三光戩曜先皇襲千齡之徽號膺八百之先期用竭誠心
以祈家福爰初鞠旅發跡神祠舉風電以長驅籠天地而遐
掩一戎大定六合為家雖膺錄受圖彰於天命而克昌洪業
寔賴神功故知茫茫萬頃必俟雲雨之澤巍巍五岳必迓塵
壤之資雖九穗登年由乎播種千尋聳日本藉崇基然則不
雨不雲則有炎枯之害非塵非壤則有傾覆之憂雖立本於
自然亦成功而假助豈大寶之獨運不資於靈福者乎故無
言不酬無德不報所以巡往跡賽洪恩臨汾水而濯心仰靈
壇而肅志若夫照車十二連城三五帶帛雲委瓊羞山積此
乃庸鄙是享恐非明神所歆正當竭麗水之金勒芳猷於不
朽盡荆山之玉鑄美德於無窮召彼雨師弘茲惠澤命斯風
伯揚此清塵使地祇仰德於金門山靈受化於玄闕括九仙

而警衛擁百神以前驅俾洪威振於六陶令譽光於千載豈
若高唐之廟空号朝雲陳倉之祠虛傳夜影式刊芳烈乃作
銘曰

赫赫宗周明明哲輔誕靈降德承文繼武啓慶留名翦桐頌
土逸翻孤暎清飈自舉藩屏維_(寧)邦家攸序傳暉竹帛降靈
汾晉惟德是輔惟賢是順不罰而威不言而信_(玄)化潛流洪
恩遐振沉沉清廟肅肅靈壇松伍羽蓋雲挂仙冠霧筵霄碧
霞帳晨丹戶花冬桂蓮芳夏蘭代移神久地古林殘泉涌滄
縈濕砌分庭非攪可濁非澄自清地斜文直澗曲流平翻霞
散錦倒日澄明水開一鏡風激千聲既瞻清潔載想忠貞濯
茲塵穢瑩此心靈猗歟勝地偉哉靈異日月有窮英聲不匱
天地可極神威靡墜萬代千齡芳猷永嗣

碑側

高一尺五寸寬一尺
二寸三行飛白書

貞觀廿年正月廿六日

碑陰

高一尺九寸寬
八寸八分七行

司徒太子太師上柱國趙國公臣無忌

太子太保上柱國宋國公臣瑤

特進太子詹事兼左衛率上柱國英國公臣勣

光祿大夫刑部尚書上柱國鄖國公臣張亮

禮部尚書上柱國江夏郡王臣道宗

太常卿駙馬都尉柱國安德郡王臣楊師道

正議大夫守中書令太子左庶子兼攝吏部尚書護軍臣

馬周

按太平寰宇記并州平晉縣晉祠碑在乾陽門街唐貞觀

二十二年太宗幸并州所製御序并書

舊唐書本紀貞觀十九年十二月戊

申幸并州二十年正月在上并州三月己巳車駕至京師

冊府元龜貞觀二十年正月幸晉祠樹碑製文親書之於

石與本紀年合太平寰宇記云二十二年誤

水經注云昔智伯遏晉水以灌晉

陽後人踵其遺蹟蓄以爲沼沼西際山枕水有唐叔虞祠

又太平寰宇記晉祠一名王祠周叔虞祠在縣西南一十

二里姚最序行記高齊天保中大起樓觀穿築池塘飛橋

跨水自洋

北齊文宣帝

以下皆游集焉至今爲北都

并州唐北都之

勝概金石萃編文云先皇襲千齡之徽號膺八百之先期

用竭誠心以祈福德又云無言不酬無德不報所以巡往

跡賽洪恩臨汾水而濯心仰靈壇而肅志是爲高祖禱晉

祠起義兵之證高祖紀大業十二年爲太原留守時羣賊

蜂起江都阻絕太宗勸舉義兵高祖乃命太宗募兵旬日

間衆且一萬郡丞王威武牙郎將高君雅恐高祖爲變相
與疑懼請高祖祈雨於晉祠謀爲不利晉陽鄉長劉世龍
知之以告高祖高祖陰爲之備是高祖禱晉祠事當在此
時以碑高唐之廟空號朝雲陳倉之祠虛傳夜影及銘內
謾靈降德承文繼武證之則兼頌邑姜非專美唐叔碑陰
所列諸臣銜有司徒太子太師上柱國趙國公臣無忌太
子太保上柱國宋國公臣瑀特進太子詹事兼左衛率上
柱國英國公臣勣光祿大夫刑部尙書上柱國鄖國公臣
張亮禮部尙書上柱國江夏郡王臣道宗太常卿駙馬都
尉柱國安德郡王臣楊師道正議大夫守中書令太子左
庶子兼攝吏部尙書護軍臣馬周按通鑑貞觀十六年七
月長孫無忌爲司徒十七年四月己丑長孫無忌爲太子

太師蕭瑀爲太保李世勣爲詹事瑀世勣並同中書門下

三品中書侍郎馬周爲左庶子八月庚戌洛州都督張亮

爲刑部尚書參預朝政十八年八月丁卯馬周守中書令

舊楊師道傳從征高麗攝中書令軍還貶工部尚書尋轉

太常卿二十一年卒

通鑑表左遷工部在貞觀十九年十一月丁亥

通鑑貞觀

十九年十二月己未敕禮部尚書江夏王道宗鎮朔州是

月中書令馬周攝吏部尚書官皆與碑合按此碑所列諸

臣七人長孫無忌楊師道從幸遼東者張亮道宗李勣皆

行軍總管馬周留定州輔太子者貞觀十九年十二月太

宗自遼東還至并州二十年正月幸晉祠從幸遼東暨留

輔太子諸臣畢會故皆得列名惟蕭瑀以洛陽宮留守而

得書名於此意以太宗歸而迎駕至并爾此碑金石錄寶

刻類編石墨鐫華金石文字記金石萃編寰宇訪碑錄平
津讀碑記皆著錄又曝書亭集跋晉祠銘帝嘗自述作書
之法惟求骨力骨力既得形勢自主不意爲庸工改鑿而
骨力形勢俱失太原縣志晉祠碑銘後漫漶殆不可辨乾
隆庚寅邑貢生楊增購舊塌未損者摹鉤校刊峙於前碑
之次今聞本原碑多漫漶致證據後摹鉤者碑又見通志
金石記

史暉造像記

記刻像坐正右兩面座高二寸五分正面高四寸五分十
字不古古圖黃四寸二分六行正書今在曲沃
縣大李莊
石佛寺

唐顯慶四年歲次己未二月戊申朔八日乙卯若夫天大
道大唯紀唯課至如包身難九漂沒不停命等浮泡有刑皆

謝然今佛弟子清信女史暉滅削家珍為亡夫解馮仙早從
風燭敬造石像一區所願亡者神生淨土家門眷屬受福長
延一切衆生俱登正覺佛弟子杜文寬及妻苟男_玄運_玄識
一心供養佛

按曲沃縣志文云清信女史暉為亡夫解憑仙造碑見通
志金石記

君照造象記

記刻三面高八寸廣一尺三寸前面二十行行十四字後
面十四行行十一字側面廣五寸六行行十二字至八字
不等正書今
在絳州署中

大唐□□□□□造像

□□非無非有即色即空游咏□□其□窺測不知其際□
光□於萬品□□□於四生識妙理於精微返迷途於真趣

公諱明字君照河東聞喜人也顛顛導其先中衍□其後公
風□天生□□有□往遭多難體解玄□□阿耨多羅之心
願造一軀石像生人之□□□菩提之念無私電影不啻其
□□□□子文義等□隆吉志□同□□膽抽腸□享
崇福□以顯慶□年□次庚申正月壬寅朔□□癸□□□
石像一堪式遵元□□他□□□□爾之宏奇雕□覘
模刻□□□□龍□鳳爭飛走□不□菩薩田人覓□言而
未□□□火繚繞□空□紅葩□月綬橫□□井真□相
□髣髴於西方金猊□容綯練於東川顛亡者超登四果存
者永斷□□七□因緣俱登正覺勒斯貞石用紀無忘其詞
曰

慧炬長明是稱無上資以□忍開其三□真迹還□梵音還

暢爰□霑沐岡不迴向其顯元□□□其□彥爰樹□因於
焉□□□品上生唯□□□棟宇□□□胄流綯其繫茲勝
業□□空存川原宇落林莽沉陰騭髮響像杖玉□金給□
□□□野長欽其鍾鼎騰譽□□流彩式追前列銘勒斯在
日月交貫陰陽□文庶並固乎南山不□□□乎東海其
側面

清信佛弟子裴父義弟文誠爲先亡父母及見存母

堂兄摩訶婁柴義婁張女什善女明兒

大姊五娘二姊七娘妹十娘妹毛念合家大小一心供養
佛□成□席義節□書

按石刻顯慶下有闕文以歲次庚申考之則顯慶五年也

劉文才等造像記

碑高二尺三寸廣一尺七寸四分中間二龕上龕高五寸八分下龕高七寸四分廣均八寸三分碑分四列第四列記二十六行行七字至五字不等第三列二十六行行十四字至九字不等第二列龕左龕右各六行行十六字至十二字不等首列龕左龕右各六行行十八字至十三字不等額高五寸廣四寸八分四行行四字題上奉爲□□□□□□石像一區十六字均正書今在山西

維大唐麟德二年歲次乙丑四月壬寅朔廿五日景窳竊聞
仰睇^曼蒼難以知其□□□□□□渤詎可^其□□□□言談
之□□在□□視聽之□時亡時有者哉然今佛弟子前翊
麾校尉劉文才劉伏護劉□才劉□顛劉君熾驍騎尉劉□
劉劉文逸劉仁觀劉俱滿劉師山等令望英髦時稱萬頁茲
言可錄動止可師鯁鯁與玉石齊真汪汪與江河比潤遂□
荆山之玉採麗水之珠綺錯琳瑯共爲義業幸值 聖明之
日能無忠孝之心各發□□無□□之德書□□□

佛弟子席公□□侍佛 佛弟子劉文同仁觀達懿瑞師□

待福六人等各為先亡七代見存父母一心供□ 佛堂主

劉文同觀達□保尋侍 願成主劉□為七代父母見存家

口內外眷屬一心侍佛 都化主劉其滿為亡父母見存家

口內外眷屬一心侍佛 發心主翊麾校尉劉文才為七代

父母世界等見存家口一心供養 發心主劉伏護妻傅各

為七代父母亡男女見存家口一心侍佛 大像主驍騎尉

劉志達□□□恩為七代父母見存侍佛 副大像主劉君

熾妻傅各為七代父母見存家口一心侍佛 大施主劉其

滿為七代父母見存兄弟一心侍佛 大齋主劉仁觀為七

代父母見存家口及內眷屬一心侍佛 供養主王彰又為

七代父母見存妻男女眷屬一心侍佛 副大齋主劉師保

為亡父見存□一心 佛弟子劉小師武達當意阿□善果
阿本□□□□八人等侍

以上三
列題名

彌陀主上輕車都尉劉仵威妻郭□君熾侍 佛弟子王阿

東 佛弟子□迴香 佛弟子王齊姜 佛弟子□維摩

迦葉主劉文才□蔣鬢為見存父母一心侍佛 菩薩主劉

□妻□各為七代父母見存家口侍 當陽主□□為亡父

母□□□□一心侍佛

以上籠左
二列題名

菩薩主劉□母李為亡夫念亡女見存男倉生郎 阿難主

劉護郭氏女月上等六人為見存父母侍佛 佛弟子傅委

陀 佛弟子劉行福母 佛弟子牛迎茅□金貨一心供養

佛 佛弟子李要端劉□志母張小女為亡夫公寢 彌陀

主劉秀剛為亡父母亡男見存母宋一心侍佛

以上籠右
二列題名

□□□□□□為亡母□□見存父母□□□佛□□張

金穎 佛弟子□基□ 佛弟子秦阿□□ 佛弟子宋阿

香 □□主劉文才姪女阿□為亡父母見存男一心侍佛

菩薩主劉阿顛為七代父母見存妻呂□懿端 當陽主

劉文逸母張為亡夫爰見存家口□□□一同侍佛以上龕左首列題名

菩薩主劉小師母□為亡夫胡應校尉□一心侍佛 阿難

主劉善信為七代父母見存母一心侍佛時 佛弟子□伏

□ 佛弟子□□□ 佛弟子張□王 佛弟子□□□

佛弟子呂□□ 佛弟子□傾城 □□主□□□妻□為

七代父母見存男女侍以上龕右首列題名

按石刻麟德二年四月二十五日景寅新唐書本紀麟德

二年四月丙寅講武於邙山之陽唐以世祖諱丙為景紀

成異代文刻當時故各不同刻有驍騎尉上輕車都尉等
皆有勤而無官者也

郭君碑

碑高四尺五寸廣一尺八寸刻銘存二十一
行五十八字行書今在汾陽縣北三十里永安鎮

唐故大將軍上柱國郭君碑

州刺史□□□司徒公□□□□□華藩分銅席□□

□□羽□□□□□□□□□□□□□□□□□□

□□□□□□拔□□大都□志隆□□□備□端懷厚□於

九功□畱情於七德汪汪有□□之量仡仡有勇夫之質父

嵩稟性虛凝不□榮□□□□□□□□□一混是非窮柱

下之深趣雙舉鵬鷄得濠上之幽情公家承禮教藉慶膏腴

□□不羣英姿□□皎皎若霜潯之暎秋桂肅肅似風嶺之

茂寒松聞詩禮而遊方觀儒墨而觀奧每登高憤歎投筆長
懷企梁竦之忠謀追斑超之義勇□□□西山之□□□□
之戎冠六郡之良家雄五陵之俠少屬火運挺災乾綱紊緒
焚原靡救□類毋遺 大唐標□帝之靈文兆蒼精之秘
籙起□□之積甲建叅野之連旗經綸大夏之墟締構潛鍾
之壤指麾日月負閭闔以□移□□山川□□□而□轉於
是薦名相府委質戎場揮霜劍而斬老生奮長戟而摧霍邑
殊勲克著授公上儀同三司于時絳州逆命不順 皇猷

公扼腕齊心衝冠目裂布魚麗之陣擬却月之城瞬息之間
俄然殲滅獲勲居冢授朝請大夫於時武周作梗同黑山之
未平建德亂階類黃巾之猶熾太原北望無復人煙之墟絳
州南指咸為戎馬之地危□孤立是日浩州四面受敵千里

絕援關山杳杳望長安如日邊歲月遙遙疑京兆於天上
單之固即墨窘若懸巢郝昭之守陳倉危同累卵於是摠管
眞繼公李仲文乘連率之華當廟畧之委以公茂族盤根任
之心背親御矢石展効立功授上輕車都尉貞觀三年顏
利碓視 龍庭控弦百萬虔劉都鄙擾亂邊垂 太

宗文皇帝坐黃屋以永懷臨紫宸以太息傷彼殘賊哀此氓
黎爰命英公董戎薄伐公□□之劍持冉有之矛執角爭
先中權後勁獲勳第一授上大將軍賞物四百段遂乃八表
又安四海清晏公乃韜戈息騎琴酒怡神咀嚙六經魚獵百
氏臨池入木之技逸少見以多慙獻賦制檄之才相如謝其
清俊上聞震展爰降 絲綸召公爲金門闕□將公辭兩
疏之□冠掛東門謝司農之官傳芳北海至七年又辟公滕

王□府司馬公志性林泉賞心風月悟有情為速朽識多財
為累愚悲景燭之不□哀霜□之逾遠深憑實相宏立勝因
雖陸生儼千金之資實朱公弃五□之產儔斯樹□未可
同季以此固辭確乎不受 太宗文皇帝崩遺 詔起

義元從班例加勲 詔授上柱國 皇帝駕幸并州公

策駟遠□蒙 恩□□□□□□段公勲庸克著英聲美於

五臣榮寵既章功名顯於六佐如何與善徒欺輔仁多爽滔
滔閔水既一逝而無歸冉冉生靈亦百年而有竭□□□□

□□遘疾薨於私第靈座空而遊塵滿□簷廓而暝禽哀追

□德於猶生想音徽而以謝農夫輟耕而永歎機婦罷織而

長嗟豈直巷絕歌聲鄰□□□□□以乾封二年歲次丁卯

十一月丁巳廿八日甲申遷窆於大夏鄉隱泉之原禮也前

臨梓澤俯眺九京却背隱岑岩巽萬仞西瞻翠嶺峻峙□□
□□□汾杳然如帶夫人王氏令望江東派流并部姻連三
擠婚□五□內睦六親外諧九族痛長城之永別淚染湘川悲
隴水之分流更成嗚咽□□□□子宏道並左親衛立性
廉讓虛已接人孝乃天性忠爲令德亞劉宗之兩驥埒韋氏
之雙珠攀靜樹以長號□寒泉□永慕以爲鑄金□□□□
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□

詞曰

按曝書亭集碑立於乾封二年中有云揮霜鉞而斬老生
蓋從太宗攻霍邑者舊唐書宋老生棄馬投塹甲士斬之

新唐書則稱爲劉宏基所殺温大雅創業起居注又云老
生攀繩上城軍頭盧居諤所部人跳躍及而斬之世咸不
知揮刃者之爲郭君而君之名以石裂終不傳爲可惜也

以上節錄
曝書亭集

金石萃編此碑前段不知闕幾行後則銘辭全

闕存者二十一行惟前一行後二行存字無幾餘則每行
只闕數字尙可讀文姓名里貫全泐賴額題郭君知其姓
唐書宰相世系表郭氏後漢末大司農郭全居陽曲裔孫
徙潁川又華陰郭氏出自太原子孫徙馮翊又郭有道裔
孫居魏州昌樂又有中山郭氏凡此數派皆無君祖父名
不知君何派君里居不可知山西通志汾陽縣北四十里
有藹泉山山上有隱泉水水經注文水又南逕縣右會隱
泉口去云据碑窆於隱泉之源則墓在今之汾陽其居亦

當在汾陽碑云斬老生摧霍邑是一事在大業十三年高祖初建義旗時絳州逆命乃八月事武周作梗指武德二

年劉武周據并州事建德亂階指武德四年竇建德援王

世充事按此兼指建德擒淮安王神通覆沒黎陽事碑云貞觀三年頡利掇邊

垂太宗命英公薄伐頡利即突厥頡利可汗英公即英國

公李世勣太宗紀貞觀三年十月庚申并州都督李世勣

為通漠道行軍總管華州刺史柴紹為金河道行軍總管

任城王道宗為大同道行軍總管幽州都督衛孝節為恆

安道行軍總管營州都督薛萬徹為暢武道行軍總管以

伐突厥即此事也碑云七年辟公滕王府司馬新書高祖

諸子列傳鄭惠王元懿始王滕徙王鄭此與滕王元嬰別

元嬰乃貞觀十三年所封不在七年太宗遺詔乃二十三

年事皇帝幸并州乃永徽五年正月事高宗紀是年二月

赦并州及所過州縣義旗初嘗任五品以上葬并州者祭

之加佐命功臣食別封者子孫二階大將軍府僚佐存者

一階高宗之加恩義旗功臣爲已厚此時君策駟遠迎宜

在進階之列而碑泐矣夫人王氏碑云痛長城之永別淚

染湘川悲隴水之分流更成嗚咽玩文義是夫人尙在而

得列於文內是此碑創見子宏道並在親衛上闕五字下

有兩驥雙珠是二子也碑之可考者如此按萃編所攷可

謂詳贍惟於碑浩州四面受敵總管眞鄉公李仲文乘連

率之華當廟略之委事尙嫌漏略浩州唐汾州西河郡本

浩州

武德元年改

武德四年更名通鑑武德二年四月丙辰劉

武周寇并州戊午詔太常卿李仲文將兵救并州六月丁

未武周陷介州詔左武衛大將軍姜寶誼行軍總管李仲文擊之兵敗寶誼仲文皆爲所虜既而俱逃歸上復使擊武周七月辛卯宋金剛寇涪州洸旬而退八月劉武周遣兵攻西河涪州刺史劉贍拒之李仲文引兵救之與共守西河及裴寂敗自晉州以北城鎮俱沒惟西河獨存武德四年三月乙丑劉武周遣其將張萬歲寇涪州李仲文擊走之甲申真鄉公李仲文引兵臨石州四月劉武周數攻涪州爲李仲文所敗宋金剛軍中食盡丁未北走秦王追之丙辰金剛大敗追至張難堡涪州行軍總管樊伯通張德政據堡自守世民免胄示之堡中喜謀且泣劉武周聞金剛敗大懼棄并州走突厥世民至晉陽武周所署僕射楊伏念以城降世民留李仲文鎮并州詔仲文檢校并州

總管按自裴寂覆師元吉失守晉霍以北皆非唐有非仲
文固守涪州犄角關西使有所牽掣而不敢進則武周金
剛之勢大盛雖以秦王神武臨之未必便克由是言之則
涪州之守固爲奇功郭君之勳尤不容沒今玩碑文其艱
危苦守之績猶歷歷如繪碑所謂能補史者以此舊鄭王
元懿傳武德四年封滕王貞觀十年改封鄭王舊紀十年正月癸丑
萃編引新書而不及舊故年月闕然合此證之郭君辟元
懿司馬無疑碑見金石錄補寰宇訪碑錄通志金石記

申德基志

石高廣皆一尺一寸十三行行十四
字正書今在灤縣東南十里申村

君諱德字儒宗南陽人也周則申伯口臧生甫稱申封爵莅
民遂居太原祁邑矣 祖達慈臨撫育亮合皇風羨譽旣彰

乃任清河縣令

君性懷杞梓德邁夜光養志

園琴觴放

曠何忽陳駒莫再燭氣竟馳春秋七十卒於私第妻孥剥裂
膽碎腸分於咸亨元年歲次庚午十一月庚子朔十日己酉
改葬上申村西南平原安厝宅兆曰靈禽相葬德感幽祇恐
谷徙河遷扇題貺其詞曰

其一 賊臨一宰官莅百戶美譽先彰三戎稱仁性懷宮徵娛甯

園長 辭慈養永卧幽墳

按通志金石記引金石文鈔申君字儒宗文稱祖達任清
河縣令而不及父蓋無爵位其云改葬上申村與下申村
相距數里咸亨至今千有餘年而申氏後裔處者猶數百
家亦足見安土敦仁風俗之厚也按唐書地理志貝州有
清河縣碑云養志邱園琴觴放曠台銘詞職臨一宰考之

則德固先仕後隱者文輕圓遒麗與屯留諸墓志相仿非
後人所能僞託所云祖達清河令可爲考晉故者之助

鄧恢墓志

石高廣皆一尺六寸三分二十一行行二
十一字正書今在屯留縣西二十里鄧村

君諱恢字文廓南陽人也因官從駕遂宅屯留其先基黃
帝漢相侍中鄧艾之苗衰鎮北將軍鄧辰之貴若夫瓊根
始構瑤緒發於帝軒玉樹分柯寶族興於呂洎茲以降厥後
大昌閭閻蟬聯不可同日而言矣曾祖顯齊燿烽將軍使持
節四州諸軍事恒州刺史祖遵明威將軍兼長流幽州都督
父霰隨朝請俄遷清胡府校尉並得謀馘王略忝預霸機有
燿緹紉照彰雲閣惟君承家赤水蘊質紫山竹野逢援早知
劍術唐運之始九五龍飛君預八百之期遂筮盟津之會蹇

旗斬將屢捷魚麗告廟祭功起家上柱國方當輸誠降闕盡
節紫庭不謂忠効莫申風霜湊理大唐咸亨元年十月六日
殞於松第嗚呼哀哉楚寶不復登壇漢珠無由照乘士女流
涕如思鄭產之亡寮窠咯嗟似卮羊公之沒宅兆無曠窆窆
有期即以咸亨二年十二月甲子朔十日癸酉遷窆於余五
城東北二里東瞻大澤龍虺所生西瞰巒山風雲交會南臨
絳水縣帶七智北眺傾城駉泉靈異於其四勝乃置廟焉忠
陵谷遷移勒斯銘記其詞曰

壽_禮孕睨鄧國開基金柯潔燿玉蒸凝暉千齡軒冕萬古垂
衣_其君之嗣也維岳降生松貞竹秀玉潤珠明雄圖爵起謀
略從橫_其閔川不駐日迫奄茲玉辭荊岫珠沉漢湄勒銘悽

愴斯人在斯_其

三

枝屯留縣志乾隆四年縣西北二十里鄧村土地廟後因築場得此始知鄧村之所由名山西通志金石記文稱鄧君字文廓南陽人因官從駕遂宅屯留則高宗乾封東巡時始居此也唐運之始告廟崇功則義旗起時佐命勳臣也而不著所授何官君以咸亨元年十月六日卒二月十二日癸酉遷窆於余吾城東北末云東瞻大澤龍蛇所生西眺峻山風雲交會南臨絳水縣帶屯留北眺傾城聖泉靈異於其四勝乃置廟焉余吾城本漢舊縣峻山絳水皆在其境大澤當指漳河傾城今虢亭驛也水經注銅鞮水又東南流經傾城西卽縣之下虢聚地理志縣有上虢亭下虢聚者也其地今屬襄垣在余吾城北七十里又志屯留下余吾城訛作余五按方輿紀要余吾城屯留縣西北

十八里春秋晉余吾邑後漢建武六年封景丹子尙爲侯

國後省五代梁攻晉潞州晉兵屯余吾寨以救之蓋於故

城置寨也

屯留縣志今屬屯留爲余吾鎮明嘉靖復築爲堡周一里

新唐書地理志屯

留有三嶧山

淮南子堯使羿射九鳥於三嶧之山

魏書地形志屯留下云陽

水源出三櫨山今縣志三嶧山在屯留縣北四十五里

疑

卽太平寰宇記屯留下絳水出縣西南此皆屯留古地可

指者又碑云曾祖顯齊燿烽將軍恒州刺史祖遵明威將

軍兼長流幽州都督父霞隨清胡府校尉隋書百官志後

齊燿鋒將軍第八品今搨本作燿烽明威將軍第六品隋

十二衛府有校尉通志古蹟考唐柱國鄧恢墓在屯留縣

鄧村又碑云漢相待中鄧艾者當爲鄧芝

裴居儉造像記

石高六寸廣一尺五分十四行行字不
等正書今在曲沃縣大李莊石佛寺

維大唐咸亨三年歲次壬申十二月戊午朔十六日癸酉并
州大都督府倉曹叅軍事裴居儉兄弟等奉為考舒州使君
敬造供養

宋治平貳年九月十五日維那頭頭裴文玉裴周成眾庄
等重新脩補

清乾隆癸卯十月二十八日奉政大夫同知江南_寧國府
事曲沃裴志灝從聞喜縣裴柏村祖莊移來本縣大里莊
石佛寺粧脩供奉

按石刻有維唐咸亨三年十二月十六日并州大都督府
倉曹參軍裴居儉兄弟等奉為考舒州使君敬造供養唐
會要太原尹武德元年五月二十六日并州置總管府_賣

靜爲長史

七年二月十七日改爲大都督府

以齊王元吉爲之

貞觀二

年十月去大字爲都督府

以李宏節爲之

龍朔二年二月十六日

又加大字長壽元年七月七日置北都改爲太原府都督

爲長史

以崔神慶爲之

按新舊諸書載唐太原府沿革無如會要

詳者此碑在龍朔後長壽前故得曰并州大都督府新舊書志大都督府有倉曹參軍居儉新書宰相世系表裴氏無其名然表有裴瞿曇舒州刺史下格載居道居業居素居默居睡等名似舒州使君卽瞿曇而表脫居儉名耳瞿曇東眷房碑見通志金石記

鄭惠王石塔記

碑高三尺七寸廣二尺六寸五分二十行
行二十八字字徑一寸行書今在長子縣

大唐故贈司徒荊州大都督克安二州都督鄭絳潞三州刺

史上柱國鄭惠王石記

王諱 字 隴西狄道人也

曾祖太祖景皇帝

祖元皇帝

父高祖太武皇帝

王即 太武皇帝之第拾叁子往任潞州日於此山奉為

先聖敬造石舍利塔壹所下并有 勅賜舍利骨叁

漆粒造藏經三千卷觀夫大造遠契洪猷永貞庶績咸熙彝

倫式敘莫不分茅土建諸侯延帝子於維藩降 天孫於

伯牧者矣伏惟 大王通源 聖澤寵位 皇華松

姿孤堅玉氣柔潤鎮靜方岳聲政洽聞都督荆安惟德是順

出守絳潞非賢勿居即何暮海沂之謠不足儔其匹也而乃

洗心覺路虔誠妙門慈林山中雕鑿寶塔智乘寺所裝飾真
容藻繪具周慶讚將畢洪滿親承 教旨躬奉 繪言

以拙補勤猥當檢校恐河海傾竭陵谷變移謹件 先皇

子孫勒諸貞石

嗣鄭王郢州刺史璲 第二王子呂國公琛 第三王子樂

平公珪 第四王子尚庸公珍 第五王子樂陵公口 第

六王子武安公琨 第七王子南海公璿 第八王子安德

公琳 第九王子新平公璉 第十王子邵陵公珩

咸亨四年十月八日檢校功德僧洪滿建

右鄭惠王石塔記釋洪滿以王曾任潞州爲造石舍利塔

一所而自爲之記鄭王元懿新唐書有傳初授兗州刺

史在貞觀七年次歷鄭路二州刺史在貞觀十年最後受

絳州刺史在總章中而不見有安州刺史之官則傳略也
時稱小鄮王亦曰鄭惠王以別於鄮王亮云元懿十子世
系表呂國公下脫琛字又脫第六王子武安公琨一人新
平郡公璉作遂則史之誤而此記第五王子樂陵公下脫
一字據表則球字也是傳與表未嘗不可互補矣

蘇昱德政碑

碑連額高六尺六寸廣二尺二寸八分二十七行行
六十四字額題十四字均正書今在聞喜縣東鎮

大唐絳州聞喜縣令蘇府君德政之碑 并序

克口書

觀夫天下不可以獨理其惟列邑乎君上□□共□□□
□軍乎□則□公□聖□應中都□□□叟□賢首宅□壇
之地禮節行而風雨順德被人靈緹印流功懸日月道存之

美仁遠乎哉粵我蘇府君名昱字奉景魏都亭侯河東相待
中則之十一代孫扶風武功人也因封命氏昆吾之胤緒克
昌賜邑酬庸司國達繫書持節漢國仰其忠臣佩印乘軒洛
陽推其說客蘇冀州之逸槩不受二天蘓將軍之盛名自高
三輔襲銅鈎而播祉代有其才蘊金冊而凝禎時無與上
大將軍光祿大夫太子少保御史大夫國子祭酒大理卿京
兆尹吏部戶部刑部三尚書尚書右僕射開府儀同三司襲
邳公又封兪陵侯房公 皇朝贈國軍事陝州刺史出入兩
官光昭百揆封侯口將鳥落印而獸銜珠折獄提衡人不口
而言口口祖夔隨晉王太學太子洗馬鴻臚卿著樂志一部
書重懸金文高積玉下口官而一息光燭玳筵臨棘署而曾
飛望華口緞父價隨尚輦直長 皇朝晉州司功秩滿高

尚不仕德為□範言成士則仲雄藏器初從主□之班元亮
遺名竟保居貞之節君以奇光照社異氣充庭龍翰鳳翼成
其文璞玉渾金比其德王公孫之綺歲致賞時□劉孺子之
鴈辰□稱邦彥□中有對日下無雙叔皮云漸於上京伯鸞
遠遊於大學萬言成諷百遍忘疲杜子夏之精專□□春之
籍甚弱冠明經高第尋授右屯衛倉曹參軍業謝青襟名昇
紫衛有司之愆克著於當官終宴之遊載推於上客既□擢
授沛王府騎曹參軍尋丁父艱去職泣□三年墳高一□方
魚□鱗而入祭擢雉接翼而來栖服闋留君沛府倉曹擇時
賢也從容碣□荏苒□庭眷彼飛文已出應留之右詳惟立
政行馳豹產之前□□選絳州聞喜縣令新城與壤左邑遺
塵河涑浩漑而疏川景霍差戩以連鎮夏墟傍□千樹成陰

吳阪遙通七山相對蒼蒼葦谷積烟雲於歲時鼎鼎蒲陂澄
日月於□□□衣冠之盛鄉□八裴土風名物之□地惟
三晉□其身正其德恆仁義足以禁非禮教足以敦善下單
車而府庭無事去什物而□界肅然猛獸惡禽咸避不□□
□□□孝□□□和意之風□在愛人善□從政武庫刑□
未□旬月之間餘杭化行詎待暮年之後俟其澤者樂道而
忘歸聞其名者□言而自勸問疾苦恤惻□□農□不□
□□寒□□而萬寶□天□交□百祥降爰有謂中之麥之
出兩歧□大□□一□□城之五穗纖芒濯露秀色翻風
雖公□以穠稼作歌仲康以嘉□□□之□□京□□
□□室以□績婦承□桑姬□化春歸岐路候蠶□而□鉤
秋□□房□□□而弄杼衣食足知榮辱其斯之謂歟□猶

御之以公方撫之以□□崇學校□□□□□寬之布
□察以臨□惟誠恕以待之夫然故盜賊空寃訟息經□邑
樹□茂過其境溝洫深都鄙有章上下有序□無二價道無
拾遺官□□詔□□□□吏□□□暇豫良辰美景自公退
食俯中庭而披外閣□磬學而敞琴堂接定□之高士引臨
叩之貴客談清靜之化讀聖哲之書時菓逮於耆德官俸給
於□□□□奇□□□□□□□□□□□□□□□□□□□□□
□□□□人祇□鷹化若斯而已哉縣丞汝南周大鼎主簿
狄道董履貞縣尉渤海□恂行扶風馬嘉賓等並□□□□貞
道存□□摩霄□□□□□□□□□□□□□□□□□□□□□
設一□聯事載奉恩徽人無間言我有餘地斯不亦休乎惟
君德貫終始本膺久大道綜多能藝優六美風流弈弈共□

天壤之間□□□自出塵埃之外穿揚百中運金鏃於神
工奉□千嬌得銀壺於舊禮綠琴風警變卉木而振陰陽綵
□雲搖寫鸚鵡而圖日月三載考績殊□之美□彰四□脩
□代□□□云□□人相顧老幼追攀街巷雲蒸間霧
門喧□鼓見萊令之初飛路咽行車屬劉君之已去合境萌
庶鄉望老人縣錄事朱德本等或名推絳老德重堯人或極
息□□優遊鄉黨僉以爲高陵善化思□□而何□密縣休
風俟登台而有日莫若激揚嶽烈□敘□音爰陳上蔡之詞
式仲中郎之筆下官遊汾□寶仕晉非材至於是邦幸聞其
政陸士龍之畫象自有生祠虞季鴻之頌聲無非載路義不
獲已嘗試銘云

地方百里人雜四鄙清原近控絳山旁峙不有大賢誰其對

美粵我令德於焉

其一

止

聲貂裘擅名其後必大莫

之與京邳公人傑晉府時英顯允

其二

慶基華閎神儀天骨

雅操凌霜虛懷

月探曠書圖窮微義窟是稱領袖

笏

其三

攸掌

臺

一

銜索俄驚負塚松竹自高

歌變

聿

其四

其虛其徐清風穆如爰清爰靜政成下車

誠

應物神用藏諸德及春

仁霑夜漁

永言

深惟

稼穡授以天時

其地方秀歧嘉穎箱千庾億

命織

析理通神乘幾任人膏

不潤甌裏生塵令行禁止時

俗

邑

德家

忠

齊舉

涼

序

稱分

飛忽阻路泣人吏亭悲士女

車無所

謠童有馬思君邑

然生祠愛結雅頌功宣登

不遠拜尹行遷

陵何事守

三年

□□□年□□□□□□□□□□□□日□□建

按此碑自來無著錄者同治癸酉景州戈履徵始訪得之
文一千六百餘言剝落二百餘字下體爲劣工重立鑿以
爲柄遂每行失去五字按邵思姓解武功蘇氏本高陽之
子重黎生祝融其孫昆吾封於蘇今之鄴郡一云扶風左
傳有蘇忿生爲周司寇史記有蘇代秦建厲漢蘇武後漢
蘇章後周有蘇綽綽生威唐書宰相世系表魏都亭剛侯
則第三子遁八世孫周度支尙書邳公綽綽生威威爲隋
左僕射房公威生夔爲隋鴻臚少卿夔生勗勗生均與均
同行者有幹昱瓌而不詳所生昱終濟州刺史碑敘昱祖
夔爲隋鴻臚卿曾祖房公威官階皆與表同惟父假表失
載碑云假官隋尙輦直長入唐爲晉州司戶得此可以補

表之闕又知君字爲奉景及官濟州前所歷階級洵可竇也碑云祖著樂志一部及唐書藝文志有蘇夔樂府志十卷碑第二樂志者省文耳碑敘昱先世功德與姓解世系表皆同惟據表昱爲威曾孫威爲則九世孫在昱於則爲十二世孫而碑云十一世孫未知孰是然表成於異代碑成於當時似應以碑正表碑云昱由明經上第官右衛倉參軍改授沛王府騎曹參軍遭憂去職服闋復爲沛府倉曹參軍職滿遷聞喜縣令三載將代縣錄事朱德本等爲樹碑銘其歷官之年文均不詳攷沛王卽章懷太子賢新唐書高宗本紀永徽六年封潞王龍朔元年徙王沛咸亨三年徙王雍計王沛凡十二年蘇君再爲府屬始遷縣令則官聞喜當在總章咸亨間碑蓋咸亨中所立也履徵訪

得此碑時剝落不及百字并知書碑者名克忠今則泐二百餘字克忠字亦不復見當再求初拓本補錄之碑見通

志金石記

梵境寺舍利銘

石高一尺八寸廣一尺六寸二十一行
行二十三字正書今在長治縣官莊寺

大唐 聖帝感舍利之銘

檢校官人司馬戴安業

夫八相分容應物而弘攝受二乘命駕自我而開軌轍是以
迷方罕託入寐舍而嬪法妻弱喪無歸赴摧門而戴慈父俯
幻機而踐迹道格四生隨滿顛而呈姿仁涵六趣櫛沐三灾
之運舟航八苦之津有念必從無求不應然後藏山示盡促
耆嶺之朝峯變海歸空急恒源之夜水雙林願命仍留住世

之恩千疊遺身詎隕將來之相可謂生滅慈謙終始經營永
闢悲田長(弘)顛力者矣舍利者即釋迦牟尼如來般涅槃之
真體也分形梵國作瑞神京乘 至弊而幽通降 天慈而
光被通議大夫使持節潞州諸軍事守潞州刺史上騎都尉
賀拔正面承 恩授頂戴而還凡四十九粒為青白二色流
瓶轉匣吐照含明離若分珠爭開日月之彩合如聚米各富
天地之容一見一聞永清三業且瞻且仰長賔六塵日以大
唐儀鳳三年歲在戊寅四月丁亥朔八日甲午安厝於梵境
寺舊塔之下恭 皇綉也尔其重扇製玉疊栴鎔金徵郢石
而陳謨命班翰而作範極雕鵠之變態究象設之閑安朝散
大夫守潞州長史崔承休司馬戴安業羣僚等並洗心申敬
濯影投誠如登剝利之期若暗闇維之會僧尼雲委土女風

趨同瞻四升之姿共憐千行之目願乘茲介福普證菩提假
此妙緣俱清煩惱刊石紀日即修後善對衆起信擔斷前惡
凡在道場念茲在茲矣

其文當州學仕張毅製之

按通志金石記梵境寺在城東北隋時建唐儀鳳三年賜
潞州刺史賀拔正舍利四十九粒正與長史崔承休司馬
戴安業藏寺內舊塔下爲舍利銘刻石寺塔久廢萬厯間
居民取土得舍利並石瀋定王程堯爲建塔於昭覺寺東
長治縣志按瀋王建塔時並碑銘瘞其下厥後寺圯塔夷
爲田同治中爲耕者所啟石螿深固眾莫測聞於郡守守
命掩覆光緒己卯纂修邑志志局諸人始發其螿得石刻
四其二爲僧畫像無題識一隋碑一卽此碑

舍利青白二
色微瑩類瑪

瑤大若豆瓣碎或如米粒以琉璃小瓶儲之乃置城東官莊寺唐碑行書有褚

歐法隋碑乃楷隸時雜篆體郡中石刻無先於此二石矣

又按府志賀拔正崔承休皆據舍利銘列職官唐潞州刺

史下今搨本通議大夫守潞州刺史賀拔正朝散大夫守

潞州長史崔承休然則承休長史非刺史志誤又碑有司

馬戴安業府志亦闕製文者爲張毅司馬戴安業書府志

瑜以下賀拔正崔承休並云年代無考按此銘明魏叔

言唐儀鳳三年或撰志者未見此銘僅據傳語耳長治縣

志舍利青白二色云云與碑所言凡四十九粒青白二色

流瓶轉匣吐照含明離若分珠合如聚米者合縣志以琉

璃小瓶儲之外鎔銅盒二裝七寶實以香屑藏石函內與

碑言重扇製玉疊柳鎔金者合又唐書地理志潞州大都

督府

開元十七年七月二日置見唐會要

儀鳳時潞州刺史爲上中下州

與否不可知今以此碑朝散大夫守潞州長史考之百官志正四品下曰通議大夫從五品下曰朝散大夫舊職官志職事高者爲守中州長史正六品承休以朝散守長史潞爲中州則承休階高於職不得爲守又舊地理志貞觀八年潞州置大都督府十年改都督府唐會要六十八武德七年管十州已上爲上都督府不滿十州只爲都督府舊志潞州督尉武德二年管潞澤沁韓蓋五州新志貞觀中分爲上中下都督則儀鳳時潞爲中都督府唐制中州都督正三品中州督長史正五品上都督長史職皆高於階故皆爲守也都督之州以本州刺史督諸州不別置刺史

張善思造像記

石高一尺二寸四分廣一尺一寸六分上截造像一龕記刻下截十行行字不等正書今在鄉甯縣關廟

大唐永隆二年歲次辛巳五月己巳朔弟子張善思妹龍妃

同發菩提為亡父見存母卜敬造像一區合家大小一心供養

父藥師男善思母卜妹龍妃

按石有大唐永隆二年歲次辛巳五月己巳朔弟子張善思云云舊唐書本紀調露二年八月乙丑改調露為永隆元年次年十月乙丑改永隆二年為開耀元年通鑑據後改元為定永隆遂無二年此石立於五月在未改元前故得稱永隆二年亦考唐史之一助也碑見通志金石記

司徒德奴妻王等造象

石高一尺廣三尺五寸題名五行在象旁記在象下行字不一字徑五分正書今在平定州

像主郡中正司徒郭買妻蕪

像主夏顏妻張息口僧

像主司徒思恒妻韓

像主司徒富妻李

像主司徒德奴妻王

雍地富平縣

人王崇簡為

外祖父韓王

府參軍□□

□婆孃□□

□徒敬造阿弥

施佛一塔一切

衆生普同供

養文明元年

四月十九日造

記

此司徒德奴妻王造象富平唐屬關內道京兆府文明峯
宗改元

段雍墓志

石高廣皆一尺二寸七分十七
行行二十字正書今在平遙縣

大唐故驍騎尉段府君墓誌銘

并序

君諱雅字德亮其先鴈門干木之後也曰官流派迺爲茲焉
夫函川峻峙宗郊鬱百代之基原部龍飛河洛播聰綿之業
本技俱殖高暎珠瑚柯萊同滋天波馮溜曾祖歡齊并州司
馬器字開詳風神秀逸星辰蘊異金碧含章祖昌隨任定州
司戶父羅并州兵曹竝資神鼎宿稟粹靈精氣蘊風雲量寬

河海君體舍冰潔性理霜凝風儀與素月齊輝翊質共清松
竟爽從先 皇問罪旄東夷策勳驍騎尉何期彼天不憖永
弃尊堂窳窳猶猶長為幽壤嗚呼哀哉春秋五十有一終於
私第夫人趙氏聞芳育德蘊雅操於幽松遠室理容朗貞心
於冰沼豈期畧運不停奄隨風燭惟君性與道合實以名昇
不忤不求惟精惟一粵以垂拱元年歲次乙酉十二月壬申
朔廿五日景申同窆於段村東二里平原禮也削臨峭巖万
仞韜口鄧背汾川九遠飛蓋孝子等恐陵谷之將變痛風樹
之先驚扣泉臺而下地積山河以勒銘詞曰

鸞飛西汜箭激東瀾松摧桂折玉碎珠殘（玄）扃永秘幽室長
闕仰瞻懸井俯聽陰湍其一陽風切響隴月馳輪音儀雖謝令

譽終存

通志金石記石於道光中出土據志雍字德亮其先雁門人曾祖歡齊并州司馬祖昌隋定州司戶父羅并州兵曹以從征高麗授驍騎尉以上節錄通志金石記按碑有云從先皇問罪於東夷者以碑垂拱元年窆於段村文考之垂拱正武后臨朝之年所謂先皇高宗也按唐會要高宗朝屢有征百濟高麗事段君蓋於高宗朝得勳者唐人於高麗百濟新羅統謂東夷北齊并爲別都州任特重歡爲司馬則州之上佐階級頗崇隋書職官志齊上州司馬從第四品上惜史無傳碑又有云景申者避唐世祖諱文清麗輕圓唐初格調與屯留諸墓志文相似碑立於垂拱元年

段威墓志

石高廣皆一尺二寸二分十七行行十九字至二十四字不等正書今在平遙縣

唐故處士段公墓誌銘

并序

公諱感字名遠其先鳳門人也原夫動物迴雲非神莫感延
祥集慶在聖必通是知靈况所甄祚隆於百代是以派瑤原
於萬國刳高封以稱家璣玉葦於九州開隩區而食氏斯竝
事芳油篆遺藹棉書可略而言豈繁醜縷曾祖昌隨任定州
司戶祖羅并州兵曹並財包杞梓節勁松筠調玉軼而縮銅
章曳清綳而趁紫公疏芳桂苑擢秀芝田掩瑤澁以凝輝
冠瓊峯而巫矚音儀休儻擯賈氏於後塵噐宇深沉制荀門
於削錄不謂驚風乍拂迴樹先厥狂吹忽飄鮮花早洛春秋
五十有七卒於家第嗚呼哀哉一時著將窆九原有安厝之
期爰卜良侵告吉茲地粵以垂拱元年歲次乙酉十二月壬
申朔廿五日景申遷葬於段村東二里平原禮也前望危峯

卻背荒涼慮恐田成碧海陵谷駭移刊誌墳中以傳不朽其
詞曰

藏舟易往閔水難亭鮮花早落迴樹飄零霧穉妙室袂去佳

城其一攸攸長夜杳杳泉扃風搖隴樹月照荒庭唯鏹卒石振

此莫聲其二

按通志金石記於道光中出土據志感字名遠其先雁門

人曾祖昌隋任定州司戶祖羅并州兵曹隋書百官志上

上州置刺史長史司馬錄事參軍事功曹戶兵等曹參軍

事志云定州司戶者定州戶曹參軍也隋書本紀大業三

年四月壬辰改州爲郡今志猶稱定州司戶并州兵曹則

段君曾祖及祖之居是官必在大業三年前隋書志罷州

功倉戶兵法士曹等書佐改行置郡郡置司參軍爲行書佐皆不名參軍志文不著段君父名以垂

拱元年十二月景申遷葬於段村東合驍騎尉段君墓志
證之君遷葬年月日與段雍同雍志云祖昌父羅感志云
曾祖昌祖羅不著父名感卽雍之猶子也文清麗芊絲初
唐體格與屯留諸墓志相仿非後人所能僞託碑見通志
金石記